

四庫全書

集部

欽定四庫全書

集部

升菴集卷三十六

詳校官編修_臣錢樾

中書_臣劉源溥覆勘

總校官原任中允_臣王燕緒

校對官學正_臣李崧

謄錄監生_臣蔣繼勳

欽定四庫全書

升菴集卷三十三

明 楊慎 撰

五言絕句 六句附

虛湖曲四首為劉少鄰賦

滇湖湛空碧。光景涵太虛。主人湖上家。結舫水中居。
湖疊通九淵。湖鏡涵萬象。陰火宵有無。波塵時下上。
留連非魚鳥。溯洄豈蕪葭。明月浴灝露。青雲汲流霞。
搖筆泳連漪。蟠卧生沆瀣。因之滄浪吟。湖亭記余邁。

出郊

高田如樓梯平田如棋局白鷺忽飛來點破秧針綠

招董西羽

朝向城中來夕向城中去獨夜一微吟攀留桂之樹

寄承冰壺

紫翠隱丹房仙人在上方欲往疑無路白雲封點蒼

搗衣杵

山東女子趙小錢年十五為賊所掠罵賊不從以搗衣杵擊賊遇害事聞詔旌

其門

戕賊金鉅擊賊掘衣杵今見趙小錢昔聞楊慙女

普賢寺

香閣影波心叢雲萬木深月明清梵夜遙應海潮音

進耳寺

蠻村藏古剎窄堵粉如雲寺圯殘僧少鳴螺寂不聞

悟空菴

一龕如燕凹中有貂璫塚石麟臥青蕪烟爇春茸茸

太平寺

忍草迷香徑空餘屋數間香鑪烟不起苔蝕鷓鴣班
松隱菴

松菴饒古松露鬣交雲尾蘿徑少人行日暮嘯山鬼

金馬寺

東林金馬寺南亭金馬關徃來皆馬客試問誰者間

白龍寺

詩人張禹山喜用白龍字何事獨無詩留題白龍寺

羅漢寺

覺路花非染靈山草亦香
虛空即此境何處覓空王

太華寺

古地新蘭若標峯冠彩霞
碧波臨萬頃指點見星槎

妙湛寺

廢刹臨官渡香臺夜景澄
僧言龍火焰却是打漁燈

積翠巖

翠巖隱玄龕苔徑無鳥跡
不見煮茶烟那知有禪客

恩波池別劉潤之

酌酒臨池水回船拂芰荷匆匆馬上去留興與烟波

毛東鎮過高嶢同宿作人名詩

釣石崇遙岸樵林放遠山東園公肯過桃李照衰顏連
荷包明月今夕茲無還

月儀帖

鸞驚開二妙蠶尾見征西花蠹暉銷僊香蟬跋認驚不

逢華蓋叟誰與重僊僊

梁元帝古跡啓鸞驚之奇聞之於索靖鷹時之巧又顯之于蔡

邕山谷詩惜無征西蠶尾手爲寫黃門急就章征西指索靖也華蓋山人宋仲溫模爲拓本也月儀帖秘

閣續刻尾有鷺字東坡詩
我今久擱筆不寫紙尾鷺

玉臺體 四首

流盼轉相憐含羞不肯前
綠珠吹笛夜碧玉破瓜年
滅燭難藏影洞房明月懸

調絲曲房下援鏡綺窓西
粧罷金星出歌殘壁月低
留歡夜未足恨殺汝南雞

戚里盛豪華聯翩赴狹斜
寶闌圍鬪鴨金瓦擲鳴蛙
歸騎春城晚風吹滿路花

菱歌歇晚涼
桂楫隱回塘
珠佩雙臯冷
羅裙十里香
錦書隨綺翼
持報邵陵王

七星關漁者

石澗無通水
漁舟反上山
得魚隨馬賣
抱獺趁鴉還
問爾江湖興
茫茫若夢間

枕上

君莫笑萍梗
來往上滇雲
我本聖之徒
七十而從軍
泥若竟何益
濁酒且酣欣

卧佛

金仙疲津梁雲卧恣天行菩薩歎退位未盡區中情二
諦憑誰解松風與水聲

紺甲麗人

銀甲卸彈箏花從玉指生逡巡捲羅袖掩抑捧金觥莫
摘相思子瓊枝最有情

秋晴遊海源寺

林壑散烟霏鐘鼓喧清曉日氣抱巒陰虹橋上雲杪雕

鴻海島來疑是三青鳥

楚江曲

巫山花已紅
楚水波新綠
兩兩浣沙人
照影鬪粧束
笑問竹枝詞
何如采蓮曲

雨霽龍門泛舟汴流回作

江干新雨晴
江纜新流上
船頭轉雲峯
船尾疊花浪
中洲蹇誰留
渺渺臨風望

太史蕭宗樂半閨園八詠

蕭名與成

詔許歸蓬車性本愛丘山臨水知魚樂披林共鳥間勞

勞車蓋影渺渺隔重關

右靜觀堂

高人厭世氛亭子枕孤雲宇定天光發風清地籟聞此
君相對處幽意許平分

中虛亭

瑤草岩姿麗金沙海色新射干翹鳳羽薜荔長龍鱗謝
氏芝蘭砌還聯玉樹春

交翠庭

早歲辭芸閣歸來卧蕙櫟已寤邯鄲夢猶註逍遙篇郊
扉未可閉洪崖時拍肩

忙中閒處

后皇嘉樹底香影覆秋盤
樵子逢王質幽人對謝安
興來歌楚頌策杖暮盤桓

摘樂山

太乙遙分種紅雲仙島香
爽氣金莖上恩波銀漢傍
田

田新咏好留刻戲魚堂

蓮池

三脊羞封禪靈瓊續楚辭
綠樽藉芳草彩筆賦山茨
十

載青霞意應同孔稚圭

茅閣

宮錦換漁蓑浮家倚芰荷
月邀三太白水漾百東坡
擊

汰歸恒晚鮫人識棹歌

浮軒

自滇歸高峽留別胡在軒

名廷祿

乘風歸吾廬臨水飲君酒顛倒白接羅攀折青楊柳相
望片帆程相憶能來否

避暑林亭

几席近漣漪枕簟依林樾琴聲歇流水扇影却明月涼
襟何道遙炎歊坐超忽

升菴集卷三十三

欽定四庫全書

升菴集卷三十四

明 楊慎 撰

七言絕句

王子淵祠

瑋睇靈芝發秀翹
子淵摘藻挾天朝
漢皇不賞賢臣頌
只教宮人詠洞簫

徐及泉相送至斜堰河

二首

滇隅流落鬢成絲
為憶家林惱夢思
沃野喜看平似掌

春郊載酒正花時

又

長溝流水引都江
斷岸危橋窄石缸
並馬不知村路遠
更穿斜堰渡驚瀧

菜子花

菜子花如黃金色
想見蘭膏春盎碧
貧女梳頭水當油
那知襟解聞鄉澤

秋夕稍涼坐蔬珠樓即景

涼牖方開一幅天
疎星點綴冷金箋
噉鳴鴈過橫斜字
寫出秋聲賦一篇

水仙花四絕

浚波微步洛川傍
合與江梅競晚芳
不見當年林處士
西湖配食水仙王

又

金盞銀臺映綠樽
清香況復賽蘭蓀
祇應岩桂為朋輩
未許山礬作弟兄

又

瑤池阿母惜幽芳
青鳥東來未許將
小玉雙成都睡去
一枝傳自段安香

又

東鯉琴高採掇新
蔚藍天上少紅塵
黃姑渚畔湔裙水
不是人間妬婦津

百日紅

李徑桃蹊與杏叢
春來二十四番風
朝開暮落渾堪惜

何似雕闌百日紅

喜浮橋成

臘尾江頭綻早梅
浮梁銀漢亘昭回
不須杜楫迎桃葉
步步金蓮夜夜來

月夕見美人過浮橋

鴈齒螭頭影動搖
金波玉鏡夜迢迢
忽逢羅韞輕盈步
疑是鮫人出賣綃

丁巳五月五大熱追涼江山平遠樓二首

平遠江山四望開
颼然風至似蘭臺
披襟便覺涼如洗
一任城頭暝色催

又

颼然風至似蘭臺
此地那容熟客來
姑射風姿冰雪妬
班姬團扇漫多才

丁巳元宵韓吳菴送燈

多病新春減醉狂
元宵作劇懶逢場
華燈珎重勞相贈
繡佛前頭禮定光

滇海曲 十二首

梁王閣榭水中央
烏鵲雙星帶五潢
跨海虹橋三十里
廣寒宮殿夜飄香

又

碧鷄金馬古梁州
銅柱鍊橋天際頭
試問平滇功第一
逢人唯說潁川侯

又

化城樓閣壯人寰
澤國封疆鎮兩關
雲氣開成銀色界

天工斲出點蒼山

又

葉榆巨浸環三島益部雄都控百蠻神禹導河雙洱水
武侯征路七星關

又

沙金海貝出西荒桃竹種華貢上方香象渡河來佛子
白狼槃木拜夷王

又

硤房草閣瞰夷庭側島懸崖控絕陁雞足已窮章亥步
驚頭空入梵王經

又

孤戍平沙望大荒遙愁海思入滄茫帝鄉東北仙雲隔
焚道西南媚景長

又

昆明池水三百里汀花海藻十洲連使者乘槎曾不到
空勞武帝御樓船

又

湖蕩魚蝦晨積塲市橋燈火夜交光
油窓洞戶吳商肆
羅帕封頤燹婦妝

又

蘋香波暖泛雲津
漁樵歌曲水濱
天氣常如二三月
花枝不斷四時春

又

煮海醴郎暝漉沙
避風估客夜來槎
雪浮杭稻壓春酒

霞嚼檳榔呼早茶

又

海濱龍市趁春畬
江曲魚村弄晚霞
孔雀行穿鸚鵡樹
錦鶯飛啄杜鵑花

白崖

雲開遠見彩雲州
一片烟嵐鳥外浮
還見前年山下路
密蒙花發艷新秋

素馨花

金碧佳人墮馬妝，鷓鴣林裏鬬芬芳。
穿花貫縷盤香雪，

曾把風流惱陸郎。

陸賈南中行紀云：南中遊女以米縷貫素馨為飾，事載南方草木狀。貫花

繞髻今猶然。

光尊寺別張愈光

萬里炎荒萬里身，銷魂何事別離頻。
光尊寺裏桃應笑，回首東風九度春。

夢中作宮詞

丙申秋七月二十四日

長信宮中夜未央，班姬團扇畫秦王。
三更雲屋西風起，

翠繁紅羅滿玉霜

粉團花

靚飾豐容膩玉肌
輕風渥露錦屏幃
釵頭懶戴應嫌重
留取餘香染夜衣

桐梓驛元夕

戴石孤峯古驛門
青羌吹角報黃昏
三家里無燈火
千樹梅花作上元

蝴蝶戲真珠花

漆園仙夢到綃宮
栩栩輕烟裊裊風
九曲金針穿不得
瑤華光碎月明中

山茶花

綠葉紅英鬪雪開
黃蜂粉蝶不曾來
海邊珠樹無顏色
羞把瓊枝照玉臺

泛滇海歸感舊口占

談笑已無錢臥月
風流不見李華仙
漁村酒市經遊處
斜日寒林鎖暮烟

寄漢州太守劉仲粟

名琮吾師南峰侍郎諱文煥之子

南峯桃李徧峨岷白髮門生今幾人
東閣郎君今健否何時同醉鴈橋春

雨中漫興東泓山中溪洱臯

四首

風裊芭蕉羽扇斜雲峯苔壁對簷牙
滿城連日黃梅雨開遍金釵石斛花

又

簾紋如水帳如烟涼氣先秋到枕邊
蚊脚蠅頭跡如掃

右軍羸得靜佳眠

又

青山繞屋水周堂
枕底潺湲夢裏涼
階下濯纓憐孺子
吾廬應即是滄浪

又

雨聲蕭寺喜留賓
窓竹簷花更可人
莫道相如徒四壁
壺中猶有錦江春

夏夕

湘水魚鱗冷簾大博山蟲篆罷鑪薰開窓對影延新月
坐愛金波洗火雲

戊申高峽中秋風雨

人家一片海心浮彷彿樓臺似十洲不用梯雲取明月
水晶宮裏度中秋

題漁娃圖

碧玉聲沉睂井邊綠珠魂斷舞樓前風流畢竟輸漁父
醉擁漁娃盡日眠

竹枝詞 九首

夔州府城白帝西家家樓閣層層梯
冬雪下來不到地
春水生時與樹齊

日照峯頭紫霧開
雪消江面綠波來
魚復浦邊晒網去
麝香山上打柴回

江頭秋色換春風
江上楓林青又紅
下水上風來往慣
一年長在馬船中

最高峯頂有人家
冬種蔓菁春采茶
長笑江頭來往客

冷風寒雨宿天涯

青江白石女郎神門外往來祈賽頻
颶風颭青旗香雨歇
山江花開瑤草春

紅粧女伴碧江濱
蓮草花簪茜草裙
西舍東隣同夜燭
吹笙打鼓賽朝雲

神女峯前江水深
襄王此地幾沉吟
夢花溫玉朝朝態
翠壁丹楓夜夜心

上峽舟航風浪多
送郎行去為郎歌
白鹽紅錦多多載

危石高灘穩穩過

無義灘頭風浪收黃雲開處見黃牛白波一道青峯裏

聽盡猿聲是峽州

方云與劉禹錫異時同工

升菴集卷三十四

欽定四庫全書

升菴集卷三十五

明 楊慎 撰

七言絕句

狼山凱歌

十首

狼山原上陣如雲
孟瀆河邊早策勛
水弩解清川后浪
天戈能駐魯陽燠

舊統邊軍赤水犀
新封京觀是鯨鯢
文昌奏入中黃霽
武庫兵收太白低

按轡收兵楓樹林絕流飛渡早傳音風前鷁退吳山靜
月下龍吟江水深

關山新月照鳴笳河朔清霜淬劒花塞上征夫猶萬里
北京歸路敢言賒

玄草清霜飽紫駟雕戈畫戟擁清油歸來始識從軍樂
痛定翻思在賊愁

嫖姚身健驕驕肥立近天家日月旂忽報內庭傳聖旨
掛紅分隊出黃扉

鷺鼓聲中曉日曠
貔貅初散鳳凰門
才從魏闕瞻中宸
便入容臺飲上尊

去時官柳萬枝黃
歸路寒葭滿地霜
挾纊已溫良月候
吹綸更作小春芳

三軍喜氣失嚴冬
萬里中原罷戰鋒
甲帳籌功星兩兩
午門傳捷日彤彤

無定河邊望旆旃
居延城外候烽烟
家家喜語占烏鵲

不用金釵當卜錢

方豪云此為詞苑一時擅場
惟何仲默十二首可與並傳

峽中

峽裡青山夢裏過
曉來春比夜來多
開蓬試看江頭路
樹樹殘梅照綠波

望中條

征馬長鳴向北風
峭關回首暮天東
太行過盡中條出
一路青山白雪中

春郊即事 二首

楊柳垂垂曲水濱
驪車日日送征塵
春來莫怪枝條少

無限臨歧折贈人

果園坊裏杏花開
公子邀歡載酒來
醉落殘英千萬片
馬頭更折一枝回

白蓮三首

凌波仙子白霓裳
風助精神露洗粧
曾向藥珠宮裏見
人間何處有紅芳

又

玉立亭亭笑粉光
浣紗人在越溪傍
鱗宮貝屋難留住

合上吳王白玉牀

又

風清月皎露華涼
深隱花叢暗遞香
寄語玉人休折盡
夜深留伴睡鴛鴦

寄遠曲

濯錦江頭烟水綠
相思萬里人如玉
瑤琴別後不曾彈
今朝才理將歸曲

暮春淇館會別以道

淇水東流生晚波
巴人惜別動燕歌
可憐裊裊垂楊柳
奈此迢迢別恨何

黃花吟

金風灑灑開黃菊
黃蝶茸茸競相逐
千英萬蕊艷且香
晚來知向何枝宿

董壩

扁舟孤棹宿楓林
獵火漁燈逼歲陰
千里思家回白首
青山江上疊愁心

詠史

月仗雲門舞彩毬
御前爭睹最先籌
須臾贏得西川印
便脫青衣擁碧油

魚鳧關

魚鳧今日是陽關
九度長征九度還
何補干城與心腹
枉教霜雪老容顏

摩尼寒夜擁爐有懷馮定水

行爐特贈遠行人
處處溫柔鄉裏身
寒夕賴君生煖熱

炭星紅噴雪樓春

雪關絕粒諭從者

僕痛馬病漫興嗟戎旅華封本一家我骨已仙元不餒
何須食栢與飡霞

冰雪封途馬蹄踏之鏗然有聲

積雪層冰路百盤銀盃逐馬玉鳴鑾老狂不怕玄冬冷
呵手揮毫興未闌

贈賈東晦

庚寅歲作附此

蘭叟和光臥白雲賈生東晦挹清芬何人為續嵇康傳
題作楊林兩隱君

于役江鄉歸經板橋

丁亥

千里長征不憚遙解鞍明日問歸橈真如謝眺宣城路
南浦新林過板橋

三題板橋館壁

朔雪玄冬凍不開僕夫疲病馬虺隤鬚毛盡向風塵白
往復滇雲十四迴

丘鴻夫旃時霖楊元達聯席同宿廣心樓枕上

口占

六齒瓊投飲百甌水樓寒榻話綢繆只須棋局銷長夜
何用埋憂與寄愁

高嶢雨中悶坐以果實散諸村童因憶兒輩

不為全生狎楚童自緣嬉戲感衰翁昨宵夢裏分明見
讓棗推梨在眼中

華亭寺僧德林送山茶花

寶地香風吹雨花林公分送予雲家玄亭大室同岑寂
相望白牛山月斜

春帖用宋人四句例三首

離別江陽初餞臘淹留滇徼又逢春敬恭四海皆兄弟
文字三都盡主賓

江國梅花頭併白高峽楊柳眼還青八村烟水移春檻
九寺雲山借景亭

豐年雪霽行天馬

戊午歲

上日春還帖戶鷄

元旦酉

天運盈

虛與消息吾生南北又東西

梅會齋惠金暈酒盃

藥王繞瓷巧製新紅綃金鏤嵌陶巾不須綵繡殷勤捧
花露仙醺別有春

贈門生楊靜夫北上

滇海門生廿載遙飛騰次第上雲霄衰年七十猶羈旅
誰向玄亭慰寂寥

謝平江送至廣通

明月清風渡兩橋相隨百里不辭遙共憐話別無長夜
紅燭清樽碧玉簫

二月廿二日飲段憲卿金樞樓

金樞樓上醉流霞何羨扶風豪士家丹砂唱罷初生月
燭剪銀臺第幾花

毛園萃芳亭與沈中白丘月渚同賦

四首

綠垣洞屋鎖烟霞五色離披百種花客子看來猶駐馬
主人何事不歸家

哨聲紅雀語黃鶯知我名園賞襟英遠客應添今夕夢
海棠紅濕錦官城

雒城一別會滇雲花底匆匆酒未醺青殿揮毫應憶我
金梁明月碧峴分

酥雨才收又夕陽參差竹粉暎花光流泉石竇停教住
莫放輕飄曲水香

詠箐底香花

滇海花名箐底香山礬風味水仙粧瓊枝本是天邊種

零落遐荒四十霜

三月十八日水濱閒步二首

魚羹蠅酒野人歡
且喜春殘花未殘
無事栖栖經半載
出門天地一何寬

又

楊林今日是昭關
白首拘留未得還
漁父浣紗渾不見
斷腸今古淚潺湲

四月二日雨中撥悶

零雨崇朝不下樓
開窓烟外見漁舟
今年四月寒猶在
坐擁紅爐送酒籌

紀夢

夢裏江陽荔子丹
覺來枕上五更寒
含情懶對痴人說
強向杯中覓舊歡

病渴汲樓前井花水飲之

半夜兒童汲井花
老夫病渴漱雲芽
八公德水何須問
甘露清冷在我家

十二月廿三日高峽大雪 四首

朔雪如篋密不開自憐身在亂雲堆
剡溪縱有王猷棹
中道那堪興盡回

佳句漁簑憐鄭谷中庭鶴氅立王恭
那知執戟揚雲老
凍臥孤村積雪中

雪滿昆池勝畫圖長吟獨坐興偏孤
何如太白襄陽道
笑坐金鞍掛一壺

雪中送炭憶前人欲暖曲身成直身
翠栢蒼松元自勁

歲寒那肯變天真

犯星歌

四首

金沙江水繞環洲
江岸家家對白鷗
漁父長歌楚人曲
鹽商愛上白夷樓

餘甘結子草交頭
暮靄朝嵐似蜃樓
飛鳥不飛愁羽墮
行人何事遠來遊

搶壘弓營徧翠微
韋韞椎髻裂華衣
松林霧合騰蛇出
草屋星流暗蠱飛

十月妖花紅滿烟
萬家蠻樹綠遮天
眼中忽見渾相識
夢裏曾遊瘴海邊

興教寺海棠

兩樹繁花占上春
多情誰是惜芳人
京華一朵千金價
肯信空山委路塵

有寄

寶刀截水恨難裁
玉筍啼春濕未開
昨夜陽臺添暮雨
夢魂飛過曲江來

升菴集卷三十五

欽定四庫全書

升菴集卷三十六

明 楊慎 撰

七言絕句

溫泉再過懷李仁甫

仙源靈液蓬壺境
碧柱紅蘅幙照影
美人來時寒谷春
美人去後溫泉冷

閏七夕

閏月新秋重七日
金風玉露夜如何
似憐天上佳期少

特遣仙姬再渡河

星回節

忽見庭花析刺桐
故園珍樹幾然紅
年年六月星回節
長在天涯客路中

野鷄坪

野鷄坪邊饒雜花
幽蘭石竹交山茶
可憐春色浩無主
徒使騷人惱鬢華

贈笋人二首

綺筵雕俎換新聲博取瓊花出玉英肯信博陵崔十四
平生願作樂中箏

玄的檀痕畫未成翔鸞屏裏鬬輕盈羅虬若向今宵見
不比紅兒比玉英

中秋

四壁蛩吟白露團西園清夜為誰歡十家門閉中秋月
只有愁人獨自看

江陵舟中贈田李二鄉客

朗月寒沙夜未分
玉簫金管醉中聞
明朝回首沅江路
愁聽清猿和白雲

宮詞

天上佳人出北方
能騎白馬射黃羊
玉顏長在金輿側
笑指青山是妾鄉

烏弔山

在浪穹縣
鳳集之所

烏弔山頭烏道微
梧葉墮黃青
篠簹九苞文彩誰得見
千古畫圖知是非

早春

江暖波光日映光，幾家同住水雲鄉。
槿籬茅屋繁花裏，也有秋千出短牆。

嘉州壁津

壁津漁火照江城，城下灘聲徹夜鳴。
寒笛莫吹楊柳曲，故園回首不勝情。

馬道壁上次韻

嘉陵江水碧迢迢，雷吼晴灘雪湧潮。
岸曲行人愁駐馬，

清猿聲在白雲霄

八月十六日遊水頭三首

易陽門外眺金天
禾黍故宮秋
可憐泛泛龍渠通野井

茫茫雉堞入蒼烟

馬跑泉水水西頭
當日帝丘成古丘
遙見雙林青靄合

尚思千騎翠華遊

放棹山陰未擬回
酒酣乘興更登臺
蒼藤古木渾無語

曾見繁華幾主來

食蓮子憶師邵

錦盃曾醉碧池春
回首風光入夢新
今日臨池剝蓮子
却思池上詠花人

以來禽果餉哭菴

佳果東來濯錦江
楚謠萍實亦堪雙
王家珍重來禽帖
青李櫻桃揔受降

哭菴餉白果

霜黃鴨脚折琅玕
結實纍纍綴蠟丸
好比仙家雙桂樹

一枝留向月中攀

春望三首

東風先到海東頭
春興催人獨上樓
最是晚來凝望處
曲堤烟柳似皇州

滇海風多不起沙
汀洲新綠徧天涯
采芳亦有江南意
十里春波遠泛花

古岸新花金碧叢
昆池三百水烟通
梁王閣道青蕪國
漁父帆檣白鳥風

寄葉道亨

欲截珊瑚作釣槎
旋隨鷗鳥狎雲沙
美人不隔他鄉月
遷客何妨著處家

書扇

墨池波染散山雲
書盡蒲葵與練裙
郎君自愛家鷄好
肯問蘭亭王右軍

楊柳枝詞二首

漢東門外柳新栽
拂曉長堤露眼開
野老攀條相向語

去年曾被賊燒來

臨水臨風漾碧漪
含烟含霧一枝枝
戰塵收後無離別

又見長條到地時

張禹山云此紀彭幸菴平藍鄢二賊事也可謂詩史可謂善頌

聖燈寺

蒼烟叢裡聖燈紅
火齊螢輝照遠空
元是楓林霜葉下
露華光泣月明中

汎舟毘江

杜若洲邊露氣香
更無人語有鳴榔
澄潭倒影天涵水

翻覺星辰在下方

賦得劉郎浦送人

吳蜀成婚此水傍至今江浦號劉郎
停撓送客休嘲咏不是朝雲惑楚王

聞笛

江樓寒笛起春聲蜀客扁舟萬里行
吹盡落梅還折柳新春殘臘正關情

渡黃河二首

河上人家杏子花
河邊人唱浪淘沙
草薰風煖春將半
若个行人不憶家

廣武城邊河水黃
沿河百里盡沙岡
麥苗短短榆錢小
愁聽居人說歲荒

三閣詞二首

桃根桃葉鬪春葩
水調歌傳穆護沙
無限江南新樂府
君王獨賞後庭花

夜籤聲斷燦朝霞
翡翠三千擁麗華
舞罷前溪明月下

白門楊柳起藏鴉

自江川之澍江贈王鈍菴廷表并東董西泉雲

漢三首

通海江川湖水清與君連日鏡中行
孤山一點衝烟小何羨霞標掛赤城

澍江色似碧醞醕萬頃烟波際綠蕪
只少樓臺相掩映天然圖畫勝西湖

海螯江鱗四時供水蓼山花月月紅
自是人生不行樂

尊鱸何必羨江東

沐五華送難縱

海上天風吹玉芝
樵童睡熟不曾知
仙翁住近華陽洞
分得瓊英一兩枝

貴竹雜咏五首

林雲菁霧不分天
清露常如雨線穿
百里迥無烟火接
依稀猶似燧人前

其二

綺繒纏髻作雕題鐵距穿鞋學馬蹄清曉樵斤探虎穴
黃昏汲甕下猿梯

其三

銅鼓聲中夜賽神敲釵擊釧闢金銀馬郎起舞娛徒唱
惱殺長征久戍人

其四

保向坡前不可留盤江渡頭惟一舟驅黿役鵲無奇術
誰是尋源博望侯

其五

龍馬先朝出養龍御前賜名飛越峯人間神駿寧無種
天上孫陽不易逢

八月十三日夜夢亡室安人驚泣而寤因思去
年丁丑是日在京師安人未明興告予曰今
日趨朝不可如常日之宴蓋其日警蹕值新
狩還也今遇是日感其賢淑又小子週二歲
之晬重感賦絕句二首

五更殘夢正迷離
窻紙光明燭焰遲
却憶去年當此日
催人晨起早朝時

稚子今朝是兩週
新衣戲舞拜前頭
傷心孺慕聲聲切
母在重泉聽得不

龍闕歌 三首

驚頭峰古接仙氛
龍尾泉香石溜分
巽婦洗酥凝白雪
樵童叫笛響青雲

青海橋下海波涼
月白霜清木葉黃
驚鷗聯翩穿遠樹

沉魚撥刺避鳴榔

雙洱烟波似五津
漁燈點點水粼粼
月中對影遙傳酒
樹裏聞歌不見人

梅花絕句 九首有序

余枕疾彌旬殘臘將盡使人探梅咸云未開怪
而語之詭以春遲出戶偶見樵女簪髻自笑曰
村姑亦風韻乎戲作數詩

探梅人似放魚人
只道梅梢粉未勻
不向村姑釵上見

那知虛負一年春

村姑只恐是花神
花信前頭報早春
奇樹芳滋休冷眼
好從初地喚真真

庾嶺岑亭隴驛遙
梅開忽近歲之朝
折來燭下爐前玩
只恐瓊枝煖易消

開自多情落亦香
殘英點綴曲堤傍
纖成白地光明錦
合與無功作醉鄉

閉戶先生何太痴
梅花開偏不吟詩
歲寒三友交情澹

却似無懷上古時

么鳳鼓邊鶴膝枝孤山清夢水仙祠覺來寒影誰能寫
苦憶逃禪老補之

夜來偷醉早梅傍風致何人繼陸郎禁酒國中佳節換
樽前誰喚點酥娘

索笑尋簷花不應被花惱徹為花憎舞筵東望開金盞
渴殺西川杜少陵

放歌曾作昔年遊千樹梅花滇海頭寶髻斜簪光照座

一船絲竹載梁州

七言六句

六月廿日永昌病臥

己未歲

涼風却暑換秋清
滇國星回舊有名
已把跳蟲秉炎火
又驅白鳥靜雷聲
老夫病眼渾無睡
四壁鼾吟勝打更
浩然閣舟泛同李仁夫作

莽蒼野色杳無津
湖翠波光欲蕩人
空籟迴聞王子吹
非烟遙起洛妃塵
明朝君上仙槎去
也憶狂夫夢海濱



升菴集卷三十六

欽定四庫全書

集部
升菴集卷
三十七至
四十

詳校官編修臣錢樾

中書臣劉源溥覆勘

總校官原任中允臣王燕緒

校對官學正臣李巖

謄錄監生臣蔣繼勲

欽定四庫全書

升菴集卷三十七

明 楊慎 撰

長短句

流螢篇

癸巳之夏卧疴三塔寺地多榛莽螢飛緯夕感東
山之詩及唐人之賦率爾操觚為流螢篇

沈沈鴈沼鬱棲連隱隱龍宮熠燿然濛濛零雨東山下
颼轉薰風南陸邊可憐合暈暉玄夜可惜分華簇絳天

絳天玄夜景微茫水簾銀牀漏未央誰家院落非天燭
何處園林不夜光夜光瀼露下天燭涼氛瀉陰火遙穿
翡翠簾流星近度鴛鴦瓦此時蟋蟀罷宵征此際蛸蟥
停沸聲長門團扇班姬閨阿房卷衣秦后屏蘇婦下機
粧不理卓女當壚酒半醒為見流螢思遠道為感流年
惜芳草暝看雙星炯不眠曉望長河白如掃蕩子從軍
向月支閨人對影滯秋期蠶書宛轉連環字鴈帛殷勤
織錦詩願得逢君拾光彩不教賤妾歛愁眉

夏水謠臨安作

階簷下雨載帽龍女嫁天公笑日反燒水淹竈巖洞青
鼃上樹叫

梅花引

櫟括簡文梅花賦

層城靈苑上林中芳菲奇樹幾多叢華滋一一寒圭變
彩艷紛紛朔籟空年歸淑氣新搖芸動琯塵共憐梅花
早迎陽已逗春吐華四照林含英九衢路玉綴明冰懸
珠離零電布漂雪影遙沉隨風香遠度靡靡挂遊絲霏

霏雜鶯霧樓上爭落粉機中妬紵素二八三五年蘭心
蕙質嫺采芳驚稚節抱恨惜餘寒和服華袿薄文衣繡
騷單顧影下瑤圯纖手弄嬌姿雙開翠琅牖四捲絳羅
帷春風吹梅畏落盡賤妾坐此斂蛾眉琴聲吟弄梅花
落鏡裏容華恐失時

伯勞吟 長短句

南中有鳥名伯勞禽經羽族稱雄豪曾隸九苞來揀竹
俗呼伯勞鳥
鳳皇皂隸
恥隨百舌繞蓬蒿青春受謝四月維夏茂

樹薰風長林短夜伊伊喔喔未有聲架架格格先鷄鳴

荆楚歲時記架架 犂鳴架架格格 堦前停蚓笛江上住鼉更熠燿收燈火

蟋蟀罷簫箏村婦侵星提甕汲山農帶月架犂耕戴勝
降桑人共羨鷓鴣歇芳君不見寄信難憑北去鴻單栖
肯逐西飛燕故鄉迢遞水雲深客遊聞此幾驚心何時
高枕松窓下細聽桐花小鳳吟

過駐節橋讀東阜劉遠夫公碑文愴然有感

溪尾水沄沄峯頭正夕曛含棲經駐節洒淚讀遺文橋

南花如浣花好橋北油油生碧草草色逐年新花開又
一春可憐東阜客今作北印塵憶昨錦江離別處江邊
手折垂楊樹千里還鄉不見君斷腸隣笛山陽賦

明月引

明月三五前看看玉兔圓明月二八後漸漸銀蟾瘦天
上嬋娟有盈缺人間寧免生離別綠醅翠醅一樽同紅
顏白首千山隔

陽關圖引

行行重行行送客安西征可憐渭城曲已作陽關聲陽
關去渭城四千五百里纔聞征馬嘶初見行塵起行塵
征馬短亭前弱柳垂楊古道邊已憐柳葉青如線更愛
楊花白似綿柳葉楊花春正好輜車且駐長安道玉壺
清酒競芬芳金谷艷歌殊窈窕徘徊共勸少留連泯默
相看兩傾倒別鶴離鸞曲易終伯勞飛燕互西東搖搖
翠幃城隅日獵獵紅旗野渡風斷歌零舞情難寫分手
回頭淚盈把安間堪羨米薪人瀟灑誰如釣魚者天涯

風物異方身爭似在家相對貧鄉夢三更懸馬首迴腸
九折繞車輪銷磨歲月緣名利鴻飛不至人偏至我所
思兮明月同君之出矣浮雲異龍眠古刻昏莓苔蕭郎
彩筆生綃開銷魂莫續江淹賦好畫陶潛歸去來

西域志

羌去陽關千八百里長安六千三百里約之去長安當是四千五百里也

松谷歌

爲陳太史賦

桂山漫招隱桃源何渺茫何如徂徠松明堂克棟梁君
材本是明堂質昂霄聳壑寥天一九臯瑞露饒聲聞三

徑歲寒偕膠漆顧我輕塵弱草同神交萬里尺書通何時九頂南岷下共聽陶家一枕風

黃栢行

行戍稿

寧食苦黃栢莫作貴州客寧食頭喫醋莫行貴州路少年輕壯心遠遊早歲從軍今白頭只今行年七十二猶作羈縻滇海陬

東西南北引

七十行戍稿

北騎與南舟山川非壯遊東迎又西送日月老賓從孤

天生而為男子東西南北四方事余何為者將無同水中漂梗風中蓬中夜起坐萬感集歟其泣矣何嗟及

烏撒寒三四五六七言

烏撒天玄雲簇雪為林冰為谷脫火龍髯縮金烏足驚
跼溪毒淫羊腸坂詰屈四載難以乘橈五技詎能緣木
獨行眾眾况瘁人向曉欲投何處宿

結交行贈張季文兼寄劉建之

澗有流泉山有塵結交易交心難親古人所以歎白首

恒如新彈冠當途少知己何況貧交多苦辛慎也早允
觀國賓金馬蘭臺獻納臣亨衢豈但復虎尾逢時吐氣
嬰龍鱗一朝遠謫濱萬死曠野匪兇誰與隣舊遊相棄
不相識平生懷抱空向人行路之難有如此感慨令人
思洗耳新知者誰張與劉一見豁然忘旅憂晤言數晨
夕歡娛歷春秋竹林不厭清狂客漆園共擬逍遙遊馬
鳴龍樹訪野寺鸞吟鳳笑登高丘山中日月自瀟灑眼
前世事空悠悠窮途握手心尚爾雲天高義誰能儔劉

子昨別臯橋頭君今復動西南騶故鄉遙憶不可見故人同心復異縣枯魚涸轍懷沫濡窮鳥空林垂羽翰黯然銷魂望去塵徒有臨歧淚如霰君上青雲翼日車我看明月隔天涯行欲尋仙三島去相思青鳥遞瑤華

惡氛行

金碧山前惡氛起虜馬來飲滇海水城西放火銀漢紅炎焰塵頭高十里兩重日暈圍白虹萬家仰首呼蒼穹相顧慘然無顏色嗚呼寄命須臾中賊徒渾幾箇枕戈

臨水臥我軍屯北門分明不敢過土酋脅盟來索官城
上無言騎堞看父老倉忙雙涕泗細說去冬尋甸事絃
急柱促柄倒持首禍今朝竟何自堂堂之陣誰主兵喁
喁公等皆儒生賊來不肯令出哨賊去但解擡空營豈
無雄武士奮身思一決咫尺轅門不肯前怒髮衝冠氣
填咽况聞千金逐日費連月公儲已傾竭土兵抄掠盡
村園升天無梯地無穴熙皞閭閻踰百年太平官府真
神仙紫薇迢迢華蓋遠虛將敲朴威窮邊邊隅一旦紛

解瓦喑鳴變作擎拳者喑鳴擎拳兩柰何君不見建武
年中任校尉又不見開元年中張乾陀

送余學官歸羅江

豆子山打瓦鼓陽坪闕撒白雨白雨下娶龍女織得絹
二丈五一半屬羅江一半屬玄武我誦綿州歌思鄉心
獨苦送君歸羅江浦

跟趺操

二四六八十言

跟趺操升菴之所作也升菴子流戍滇陰朱克

明左性之二子惠然肯來濯我同波如逃虛者
踉蹌空谷聞人足音跼然喜矣況而嬰其鳴矧
而粲之見久矣夫子之據梧而弗音也感詩人
徵蒙莊反昭文焉使繼之作踉蹌操

更長夜良明月養魄華燈熈光戎客違家萬里美人來
天一方誦謫仙惜餘春之賦歌屈子悲回風之章將予
逃禪兮如是觀之域與子中聖乎無何有之鄉

薛畏齋兵憲望鶴樓吟

君不見貞觀薛少保下筆好寫青田鳥
又不見開元薛
郎中兼泛滄浪學釣翁名家羽儀有如此
後來傑出復
難比明心炯炯在雲端仙標昂昂如畫裏
黃鸝磯邊鸚
武洲高人別起望鶴樓渺渺烟霞連北極
悠悠天地入
東流驚浪顚波須砥柱未許維山招隱去
楓葉寧栖楚
客林桃花不問秦人樹赤霄玄圃記升沉
今也鳴皋昔
在陰坎止流行隨所寓山林鍾鼎亦何心
一覽鶴樓卷
重賦鶴樓吟
嗚呼少保郎中雙南金世無杜甫誰知音

鄒生行贈謙之編修謫官廣德

彗星夜掃文昌宮天下學士悲途窮鄒生上書叫閭闔
九關虎豹誰爲通雷公怒號玉女笑囚笄鸞鳳隨沙蟲
蠖伸龍屈應物理曲釣直弦羞謠童君不見賈生昔遇
漢文帝一疏反覆雙流涕忠臣自古憂聖明近侍何曾
忘獻替石渠天祿君少年文彩照耀金華筵從祀擬奮
獲麟筆豐稊思陳雌雉篇以茲瓠落甘流放金馬長鳴
下仙仗北極逍遙紫氣傍南陵彷彿丹丘上涼風蕭蕭

吹五兩登蘋聊騁平原望遷客心隨江水流遊子夢繞
浮雲嶂清商吟激楚唱酒闌擊節氣悲壯月寒江清劒
光盪水有蛟螭陸犀象感慨贈君隨君向君向江湖脫
網羅我淹京邑阻烟波乘風焉得騎鴻鵠萬里相隨一
羽過

升菴集卷三十七

欽定四庫全書

升菴集卷三十八

明 楊慎 撰

長短句

賦得絕纓歌送客之楚遊

代人作

楚王宴客章華臺
活花起舞夜春來
螭膏鳳腦光如晝
蛾眉蟬鬢空徘徊
絕纓美人信貞淑
牽衣上客何悲感
君王愛士輕嬋娟
盡絕冠纓始張燭
張燭開筵復盡歡
青楓鴉啼白露寒
明日褰旗方城野
還是夜來牽衣者

君不見戰國諸豪雄以色結死士齊有孟嘗君燕有丹
太子君行弔古過楚宮美人何在臺殿空醉看落花如
錦地裙腰綠草眠東風

明湖篇贈羅野庭

玉鏡明湖春水綠君乘星輶向滇蜀接憶清風豁瘴烟
搖筆高吟振空谷碧雞金馬我嘗遊寫韻遙岑海上樓
披雲不得隨雙屐此日相逢談九丘珠玉照人慚我老
邂逅開樽即傾倒岫嶠遙瞻翠靄顛峨嵋近指青霞杪

紫河車金光草便欲相携訪蓬島百年良會苦蹉跎江
上題襟別思多石扇洞門恒不鎖期君來興一來過

交河令行贈袁子變

袁侯出宰古交河銅章墨綬雜雕戈黃雲高闕芳菲少
紫塞長城氛祲多桑榆蔭入嫖姚幕絃誦音諧勅勒歌
公主琵琶玉連瑣將軍騶裊金盤陀袁侯雕龍且韜豹
白羽指揮坐中翽阮瑤軍書王粲詩魯連飛箭劉琨嘯
始信扶顛壽策良赫赫威稜動北荒虎鈴帳外闕山月

燕寢香中鼓角霜君不見隆州虞允文海鯨船破百萬
軍又不見巴渝甘興霸江表虎臣雄吳下古來文武道
本同樽俎笑談能折衝六鈞弓與一丁字調言悠悠非
至公九重側席思儒將丙夜庚牌下天上莫嗟騏驎困
鹽車會見漢庭徵魏尚

孝津行

岷山青蟠空下映掣爲江江濱有孝娥自名叔先雄娥
父爲功曹冉冉趨府中泛舟越洪濤捐軀以凶終娥也

痛父死臨淵矢相從練囊封兒臂珠環係兒躬寄言與
兄別別去不再逢寧假龜鼉梁直下蛟龍宮川后垂玄
鑒江妃憐丹衷死抱父尸出依泊亭花叢戚黨悲復感
閭里唁且閔風誼動今古廟貌森穹崇文紀與令伯祠
墓相西東解使犍爲縣永作忠孝邦岷之山石可泐犍
之江波可竭千秋菊兮萬春蘭孝娥之名焉可滅

三岔驛

三岔驛十字路北去南來幾朝暮朝見揚揚擁蓋來暮

看寂寂回車去今古銷沉名利中短亭流水長亭樹

草池歌贈余懋賢

謝氏池塘句風流百千春何人繼程美之子稱瑛珍蠹

叢古城青衣水炳靈毓秀王楊里

此王楊王當楊棟也

君家渾渾

枕江湄分源一一俱鍾美天馬出閑無暫蹶芳桂秀林

擱駢蓋司馬高名在朔邊蟬聯奕世更材賢清遊阮氏

竹林下盛世常家花樹前伯季文武聲猷大仲也東山

恣雲臥大雅先跡婉三陳競爽何曾弱一箇鶴池渺雲

霄芳池華羽遙仙源誰縮千里地覲予重賡春草謠三
玄亭上停鸞鑣五華煙霞迥見招碧泉仙舟影泛泛蒼
山秀句氣飄飄天涯瑣旅知音少眼中之人吾獨老欲
問江中湛湛波却憐河畔青青草吾生摧頽思一丘君
今當途仍黑頭功名在子豈殊我坡翁有語君知否開
樽飲我酒歌詩為我壽君詩已抗三謝行鄉衮不必追
王楊顧君勛名繼司馬大荒白首沾餘光

送樊九岡副使歸新繁

名景麟

別君於南雲碧鷄之澤追君於東城金馬之坡酌君以
蓮葢清麴之酒侑君以竹枝巴渝之歌天涯岐路鎮長
在故人零落渾無多憶昔君爲漢陽守滄浪之清古無
有拂衣掉頭不肯顧飲水舊謠在人口明詔復起句町
行官突未黔先濯纓宦遊不博歸故里榮祿何如全令
名九隴高岡白雲野吾廬世耕在其下清冷好結鷗鷺
盟春秋願醉雞豚社蜃雨蠻烟老玉關小山叢桂不同
攀愁心如月何時掇夜夜隨君夢裡還

舟中閱唐詩紀事王起李紳張籍令狐楚於白

樂天席上各賦一字至七字詩以題為韻遂

效其體為花風月雪四首宋人名一七令

花摘錦鋪霞邀蝶隊聚蜂衙珠璣姹女寶髻宮娃風前
香掩丹月底影交加綠水名園幾簇青樓大道千家謝
傳金屏成坐笑陳朝瓊樹不須誇

風偃草飄蓬過竹院拂蘭蕪柳堤搖綠花徑飛紅青缸
殘燄滅碧幌嫩涼通漆園篇中竿籟蘭臺賦裡雌雄無

影迴隨仙客御有情還與故人同

月霜凝冰潔三五圓二八缺玉作乾坤銀為宮闕如鏡
復如鉤似環仍似玦蘭閨少婦添愁榆塞征人怨別漢
家今夕影娥池穆穆金波歌未闕

雪凝明澄徹飛玉塵布瓊屑蒼雲暮同巖風曉別深山
樵徑封遠水漁舟絕南枝忽報梅開北戶俄驚竹折萬
樹有花春不紅九天無月夜長白

朝暾行

荒雞鳴朝暾攬衣國西門辭家從軍已四載欲歸未歸
仍苦奔王孫曾遭蓮勺困宣父亦被伐木屯古人賢聖
且如此今我鬼瑣何足論行行將何適四郊盡荆棘欲
留不可留欲行行不得歲月無情日崔隤頭童齒豁心
已灰中達撫劒腸欲結短歌激烈長歌哀長歌哀淚盈
把匪兇匪虎在曠野結愛同心難盡言況是悠悠行路
者

送雷時若還蜀兼寄劉改之

離離劍上斗落落琴中星丈夫不得意且持歸紫局秦
川迢遞幾千里燕臺八月涼風起閒居已懷宋玉悲况
是登山復臨水下馬津亭落日黃飛鴉不盡翔雲長旅
店夜眠聞葉下山城早發見新霜到家正是初寒月酒
熟橙黃肥紫鰕高堂稱壽有餘閒還肆高情訪林樾問
訊江湖劉改之別來憶我有新詩明年早遂臨鑣約要
及春城桃李期

李文正母麻太夫人壽九十詩

三章

星沙炳靈仙李有故柯星沙炳靈仙李有故柯風霜不
摧雨露何多度索山中蟠桃同花歌以言之仙李有故
柯

昔聞仙家麻姑多歲年昔聞仙家麻姑多歲年結璘不
處鬱儀屢遷平陸成波滄海為田歌以言之麻姑多歲
年

淳風復返上壽真可期淳風復返上壽真可期戲彩含
飴瑋筵獻卮琅琅仙音僮僮月儀歌以言之上壽真可

期

夜郎曲

三首

夜郎城桐梓原東堞壘平村民如野鹿猶說翰林名

城在

桐梓驛東
十餘里

夜郎溪槃木陰中半景西漁舟投樹宿水鳥逗花啼

溪名

趕水在東溪
南平古城下

夜郎歌漢宮曾取教秦娥竹枝傳窈窕楊柳轉猗儺

夜郎

歌即巴歛也
今名思南歌

壽林圖

玉堂天上何陰森，玉樹堦前接壽林。
壽林草木紛滿地，中有椿萱獨靈異。
青崖丹壑晴寬高，仙都真境分秋毫。
壺天空濶海色古，茫茫翠水環波濤。
呼龍耕煙鳥爲耰，瑤草瓊枝幾昏曉。
不信婆婆急景凋，貪看縹緲齊煙小。
玄洲遊戲八十秋，木公金母共忘憂。
翠琅玕紫芝草九霞觴，三青鳥誰將滄海圖移向長安道。
蓬瀛仙客金閨英，錦衣玉珮趨承明。
仙瓢灑灑泛雲浪，賓筵炯炯映長英。

庚鼓以洞越瑟和以參差笙三嘆清廟之遺響再補白
華之遺聲椿樹無陰萱不歇堯莫再數新年月

博南謠

瀾滄自失姜兵備白日公然劫行李博南行商叢怨歌
黃金失手淚滂沱鐵索菁邊山差我金沙江頭足風波
為客從來辛苦多嗟我行商柰若何

燕麥謠

馬牙冰滿林白損我苦蕎傷燕麥甲子陰鳥無食山頭

農向心客睺睺荒眼雙流血
臘馬躋春牛吼癩象來窮
軍走括金使者空城守

老鴉林謠

老鴉林水塘鋪夷寇劫商斷行路
人不行蔓草荒官道
變為蛇虺場今日再逢太平日
冷場來往由康莊何年
始昔年己酉今壬子竹詔金柝聲
相聞九哨連連轟雲
起老鴉革其音水塘復清泚
商歌旅舞一千里云誰之
思郝御史

佛現

鳥名峨眉山有之聲呼
類佛現每叫必有金光

佛現佛現鳥語易隨人意變山川發晶熒草木呈葱蒨
坐使遊人心目亂佛現佛現

後河激歌

二首

携女娟兮遊清池臨徬徨兮步委蛇翠管兮東靡丹蓉
兮西披俄風鬟兮霧鬢忽雨帶兮雲衣悄余脰兮延佇
望君馬兮來遲

翡翠為竿兮虹蜺為絲拾海月兮采江離澀魚腴兮惜

龍妃蘆中兮悵空悲前有樽酒兮羞以滇芝君不醉
兮曷歸

競渡浪系三言

天中屆午節戾雨不雨霽不霽扇涼颼消暑氣江之永
水無際橋橫霓樹如薺王窪菖錦林荔競龍舟蕩犀柅
殷雷鼓浮雲吹汨齊出澆潏揭靄迺倡于為繼慄爭奪
纛相掣楚曼姬巴妲妓影照釵沫濺袂山凝紫日映未
鱗霞穿蟾鉤綴樂無荒倦而憩榜購艘汎容裔矍鑠翁

尚兒戲傲琦玕厓浪系

山行即事

桐子花開暎村塢單衣初試貧兒舞春寒已過四十五

詠梅

元僧高峯有此詩而不佳特賦一首

九言

昨夜小春十月微陽回綠萼梅蕊早傍南枝開折贈未
寄陸凱隴頭去相思忽到盧仝窓下來歌殘水調沉珠
明月浦舞破山香碎玉淩風臺錯恨高樓三弄叫雲笛
無柰二十四番花信催

升菴集卷三十八

欽定四庫全書

升菴集卷三十九

明 楊慎 撰

長短句附雜體

望西山

望西山西山迢遞慶霄間
峯輝林彩如堪挹翠壁丹梯
若可攀亦有青鳥占紫氣
還乘白鶴駐紅顏斗極南陔
分王氣天驕北漠控胡關
近接橋陵鼎湖路太乙勾陳
臨玉樹遙瞻雙闕對氤氲
葱蔥鬱鬱捧瑞雲潤接天河

起箕尾根纏維絡鎮坤丈長安樓閣中天起峻極相連
近天咫金芙蓉開萬井中晝畫屏張三素裏龍宮鯨吼
曉嵐青鳳城鴉宿烟光紫雪晴瓊嶽轉分明日映名都
一何綺雪晴日暎風光和陌上遊人積漸多相邀帝女
柔桑路具柰王孫芳草何靜婉香車褰翟茀嫋姚飛蓋
擁盤陀楊柳千條金作線梨花百葉玉為柯雕俎華筵
分內苑錦塲繡野入平坡行行國艷皆桃李處處塵香
盡綺羅巨靈鼎屬應相避玄圃蕭條未許過別有青蓮

千萬宇金榜紅牆園淨土錫卓多非漢代名翬飛各占
周原膺橫玉行香盡貴人揮金資福皆豪賈菩提花發
六時閒吉祥風動千鈴語海曇仙梵日供張鉢衣寶鬘
時歌舞望山竟如何由來逸興多朝回長挂笏休沐想
鳴珂三月春將謝未請遊山假痼疾在烟霞俗鞅縈晨
夜閑人真遂愛山情常曲天西少送迎短屐踏莎占土
脉奚囊探韵賦春晴豈似神仙限官府愛山空作望山
行

觀打魚

石梁水落天波澄
漁人放獺如放鷹
編釣作航來往便
往似飛拔來似箭
蛟潭無極龍客幽
江空獺饑漁人愁
漁人愁河魴喜
清江一曲孤烟起

太華山歌送陳子學

陳名講

五星墮地為五嶽
金虎西南動芒角
踐華為城類削成
云是巨靈之手斲
三條鼎立當中央
直與鴻濛莫清濁
太一終南培塿開
洪河清渭繞行杯
日華先照蓮花上

雲氣常從仙掌來，高穿箭括通天路。
俯瞰明星玉女臺，冷然風馭不可駐。
降望大壑令心哀，繡衣柱史巖廊才。
入闕玉節凌崔嵬，搖山撼嶽下閭闔。
青冥白日驅風雷，奔軼絕塵亘萬里。
驄馬蹀躞無虺隤，君家老仙舊隱處。
丹爐石榻荒蒼苔，登臨不問烟霞侶。
但借神池一勺洗，盡區中埃千仞峯。
端秋隼健題書好，寄西風回。

河橋篇寄用貞懋昭

渾河流，水桑乾，潮何年，伐石架長橋。
玄鼉窟近填烏鵲。

滄海波平上赤霄尋源知近遠浩浩鴻流滿平連太液
池迥接昆明苑帝里神臯紫氣中天江析木銀潢通澗
瀝卜洛應相並灞漦朝宗詎可同星傳雲槎下城闕電

逝颺馳交冀越橋外車音響若雷橋畔閑干明似月

玉溪

云模寫
殆盡

可憐楊柳裊晴烟才見藏鴉又噪蟬東西溝水

分岐路南北烟霜感歲年

玉溪云
有感慨

沉璜使者辭芳甸聯

壁才人遙出餞別浦清沙漾縠紋回漱秋濤收組練飛
蓋臨風緩去旌青門落日彩霞生懸知濯錦江邊夢轉

見蘆溝河上情

玉漢云全篇氣
格絕似初唐

江上聞箏曲

清江明月懸光彩映漪漣燈影近臨水
箏聲遙出船明月華燈兩相照箏語絃聲何
要妙輕璘緋彩艷陽歌掩抑推藏苦寒調
不見新粧出鏡臺想應纖手拂香埃若
非汝南劉碧玉定是秦中薛夜來二八蛾
眉競丰脣十三鴈足傳情徧溫侯帳底氣
若虹謝傳筵前淚如霰舊

寵新期容易乖高張疏節迴難諧金杯漫自傳芳酒羅
袖空勞掛玉釵曲終如鼓湘靈瑟斷腸似和胡笳拍淩
雲未遇揆天才幽吟一夜東方白

和章水部沙坪茶歌

有跋

玉壘之闕寶唐山丹危翠險不可攀上有沙坪寸金地
瑞草之魁生其間芳芽春茁金鴉背紫笋時抽錦豹斑
相如凡將名最的譜之重見毛文錫洛下盧仝未得嘗
吳中陸羽何曾覓逸味盛誇張景陽白兔樓前錦里傍

貯之玉盃薔薇水擬以帝臺甘露漿聚龍雲分麝月蘇
蘭薪桂清芬發參隅迢遞渺天涯玉食何由獻金闕君
作茶歌如作史不獨品茶魚品士西南側陋阻明揚官
府神仙多蔽美君不聞夜光明月投人按劍嗔又不聞
擁腫蟠木先容為上珍

往年在館閣陸子淵謂予曰沙坪茶信絕品矣何
以無稱于古余曰毛文錫茶譜云玉壘關寶唐山
有茶樹懸崖而生筍長三寸五寸始得一葉兩葉

晉張景陽成都白兔樓詩云芳茶冠六清逸味播
九區此非沙坪茶之始乎

青城紀遊贈劉珥江

愛山人少說山多名山之約恒蹉跎美君曾次有丘壑
偕余步履尋松蘿晨發浣花道夕憩郫筒阿子雲閣上
靈簡散杜宇城頭烏尾訛鴻蒙宕崢嶸臨天谷岷阜嵒嶮
瞰驚波離堆仞佛蟠巔巔都堰蜿蜒壓蛟鼉翩如楚磯
駕黃鶴駛如蜀棧騎青螺昌黎扶掖赤藤杖謝公屐齒

青苔窠玉喬雙鳥能濟勝鄭虔簷花同經過伏龍仙觀
摸斷碣疏江新亭聽俚歌下瀨千筏風外鷁遙岑一點
烟中螺漏天夜雨丹枕警朝雲解駁紅鏡磨玉壺携春
恣談笑銀鞍傍險仍娑娑明月津亭又分袂睽景復命
江陽舸聊書短韵邀君和青城回首青嵯峨浮生聚散
飛鴻似四者難并將奈何

太華寺別張季文

華頂雲滇海月攜手三度遊同心兩迴別攜手同心此

地分他鄉客路復離羣
明年載酒花林下啼鳥春
山誰共聞

刺桐花行

刺桐花惟嶺南及滇中有之
異物志曰刺桐即蒼梧嶺南多此物因以名郡
滇中名鸚哥花花形酷似之
開以夏秋之交酒邊率爾命篇云

刺桐花蒼梧樹滿洒迎涼
辰菴藹留炎暮渥翠掃蠻烟
飛英飄瘴霧蠻烟瘴霧雨
餘天耀彩舒芳最可憐
紅欺

鸚喙淺砂點鶴頭鮮連林千炬爛照水百枝然星回節
後流螢院乞巧樓前烏鵲筵邊候兩年通象譯方隅萬
里接龍編故鄉殊未返空園聊息偃一夕復一朝行看
歲華晚環波海碣渺渺流千雲金碧層層獻汀際遙瞻
柳渾洲隴坻長望張衡坂鈎陳閣道紫微垣鳴鑾曳佩
列文軒建章東回下鵲沼甘泉西對宿麟園金芝晞暉
商飈起玉植青蔥瑞露繁翡翠叢中遊蛺蝶鷓鴣黃葉底
集鵲鵲枝近上林全許借樹高温室竟無言詎信長年

悲落木誰憐遷客賦登嶺歸去來定何日秋菊英英桂
將實憩遽廬宴蓬華濁酒田家醉不辭清纓漁父愁先
失

雪關謠

雪關謠述途人思何將軍也將軍名卿成都人

雪山關雪風起十二月斷行旅霧為箐水為臺馬毛縮
鳥鳴哀將軍不重來西路何時開

伏枕行贈嚴應階

嚴名時泰

慎也投荒今五年竭來臥病左足偏臨床伏枕與子別
心斷神傷魂黯然憶昔去國行戍邊弔影纍纍入瘴烟
永昌試問在何處都門相違萬三千虎豹晝橫林箐側
魑魅夕度關山顛肝腸欲絕隴頭水夢寐忽到夜郎天
肉黃皮皺形半脫喜一見子日周旋除館西河客樂土
傾壺北道賓初筵悲歌慷慨悲壯士風流儒雅追先賢
解鞍青鞵洞褰裳碧玉泉抽子瓊敷藻枉我瑤華篇衰
遲遠尋留藥價寂寞時共買山錢同手意氣同兄弟異

鄉會合情尤異負交豈歎雲雨翻急難實在風波地昂
昂嚴夫子矯矯人中龍長才抱經濟大雅含春容叩之
清廟絙朱瑟懸之東序鏗金鑄我今甘心憔悴窮山中
子亦胡為淹留簿書叢朱輪五馬人生貴青翰雙魚海
若宮七澤霜風鳴五兩白蘋丹楓渺予望分手遙指大
江西愁心已掛匡廬上嚴夫子交誼非凡流往時傾蓋
今白頭子行高步隘九州我病崔嵬思一丘水蛭草駢
那忍棄雲鵬離鷗難相求待子功成採藥去期子共結

逍遙遊

畫草蟲為黃月坡賦

黃名俱

天下幾人畫草蟲吳興公子癡孫隆水縑雪練鳴趙趙
丹屏繡几飛薨薨漁父蜻蜓愛釣縷美人蟋蟀嫵鵬籠
百種生意何融融夷羊非羊鴻非鴻長卿帶晚翠簡子
矜秋紅王孫西遊歸未得清江碧草烟濛濛憶昔曹不
興點蠅惑頓翁滕王掃蛺蝶摹榻喧唐宮宋家道君入
能品鸞標籠軸沉毡穹古來好手竟寂寞老癡江東灑

壽亭侯廟蒼山傍金生畫壁真擅場只今一百五十載
火旗雲馬神揚揚古來好手吾能說開元之中三昧絕
左衛將軍李思訓右丞才子王摩詰金生動筆師王李
古法不墜今罕比有時放遣來滇水尋奇亦過蒼山址
乘興歛然掃素壁蛟龍抃舞長風起千年戰功猶昨日
颯爽英姿炯不死想見解衣槃礴時寂寞後代覓心知
蛛絲蟲網日凋壞賞者何人護者誰翻嗟古來才士無
沒亦何限感慨為爾擊節生遙悲

升菴集卷三十九